

皇朝藩部要略

皇朝藩部要略卷之十七

前史官壽陽 祁韻士

寶山 毛嶽生

編次

江陰 宋景昌

校寫

平定 張 穆

覆審

西藏部要略一

西藏卽唐古特別稱土伯特。凡四部曰衛，曰藏，曰喀木。曰阿里。轄城六十餘。衛在四川打箭鑪西北。諺稱前藏。其首城曰拉薩。藏在衛西南。諺稱後藏。其首城曰日喀。紫喀木在衛東南。其首城曰巴塘。阿里居藏極西。有城

曰達克喇距岡底斯山三百餘里西南徼地漸高至岡底斯山而極其西北有僧格喀木布諸山亘阿里北二千餘里入喀齊部境東北有諾木汗烏巴什諸山環衛地達西甯凡六千餘里西南有們那克尼爾諸山亘阿里南二千餘里入額訥特珂克境額訥特珂克卽古天竺國也東南有達木楚克喀木布諸山亘藏衛達喀木凡七千餘里禹貢曰導黑水至于三危衛藏喀木統爲三危喀拉烏蘇經其地入海蒙古謂黑曰喀拉謂水曰烏蘇在唐宋爲吐番元明卽烏斯藏地俗喜浮屠法設紅黃二教以冠別尤重黃教達賴喇嘛班禪喇嘛掌之

代理藏務者曰噶卜倫次曰代奔次曰西爾奔次曰尙  
卓特巴分理兵刑財賦其治民者曰宗奔戶五出兵一  
賦納達賴喇嘛市打箭鑪地貢道由西甯入達賴喇嘛  
班禪喇嘛使稱堪布噶卜倫使稱囊素喀拉烏蘇設堪  
布喇嘛一穆嚕烏蘇設蒙古宰桑一司郵務唐古特西  
南布魯克巴拉達克巴勒布諸國道遠不自至因達賴  
喇嘛納貢達賴喇嘛居拉薩曰布達拉布達拉與普陀  
音近普陀山有三一在浙江定海縣一在額訥特珂克  
之南海一在唐古特卽達賴喇嘛居別有伊克昭巴罕  
昭相傳布達拉爲吐蕃贊普建牙所伊克昭爲唐文成

公主建巴罕昭爲吐番妻他國女建今猶存唐長慶中與吐番定盟碑及文成公主所事佛像班禪喇嘛居日喀紫曰札什倫布唐古特謂如來相曰昭大曰伊克小曰巴罕福壽曰札什須彌曰倫布以示慶也達賴喇嘛班禪喇嘛明宗喀巴二大弟子宗喀巴興黃敎弟子數千人達賴喇嘛位居首其名曰羅倫嘉穆錯說者謂羅倫嘉穆錯而前行敎額訥特珂克巴勒布唐古特諸境凡五十一世率荒邈難稽自羅倫嘉穆錯而後世以化身掌黃敎一世曰根敦珠巴二世曰根敦嘉穆錯始立第巴代理所部事三世曰索諾木嘉穆錯卽明時所稱

活佛鎖南堅錯也明懲唐吐番亂思制御之永樂中封  
番僧爲大寶法王大乘法王大慈法王闡教王顯教王  
化教王贊善王護教王凡八王並給敕印成化中大寶  
法王來朝遣內監以鹵簿送之不達而返索諾木嘉穆  
錯時諸番僧莫不俯首稱弟子四世曰雲丹嘉穆錯五  
世曰阿旺羅卜藏嘉穆錯卽所稱第五輩達賴喇嘛也  
喀爾喀及厄魯特部長敬禮之有藏巴者爲唐古特汗  
居日喀紫第巴奉達賴喇嘛居拉薩不相能

本朝崇德二年喀爾喀三汗奏請  
發幣使延達賴喇嘛

四年厄魯特使繼至因

賜書達賴喇嘛

五年

遣使往達賴喇嘛所以喀爾喀有違言不果

七年達賴喇嘛班禪喇嘛偕藏巴及厄魯特顧實汗圖魯拜琥遣使貢方物達盛京表稱

曼珠師利大皇帝義取文殊佛號且切音與滿洲近也  
今歲獻丹書克如之使至

賜宴

命諸王貝勒宴如次留八閏月

八年

遣使存問達賴喇嘛稱金剛大士復賜書班禪喇嘛給銀幣器物有差會第巴乞兵厄魯特稱藏巴虐部眾蔑釋敎額實汗自青海擊之事聞

賜敕顧實汗復

諭藏巴曰爾稱佛國護法遣使上書邇聞爲厄魯特所敗特賜函緘嗣當修好勿絕藏巴尋爲額實汗所戕初藏衛及青海巴爾喀木皆隸唐古特額實汗襲青海據之令巴爾喀木納賦復侵藏衛陽崇釋敎陰自強給地達賴喇嘛班禪喇嘛遣長子達延轄其眾號鄂齊爾汗

第六子多爾濟佐之號達賴巴圖爾台吉。

順治三年。達賴喇嘛額爾實汗各遣使貢金佛念珠。

賚甲冑弓矢皮幣。

四年。達賴喇嘛班禪喇嘛表頌

功德獻方物。

五年。烏斯藏闢化王遣僧索諾穆拉什來貢。

賜妙聖慧智灌頂國師號。

遣使召達賴喇嘛。

六年。達賴喇嘛奏明年歲在寅俟辰年入覲。

九年。壬辰正月。達賴喇嘛以行期聞。鄂齊爾汗使從。

遣官迎。

詔定正副貢使賞例。十二月，達賴喇嘛入覲獻方物。  
賜宴南苑。

詔建黃寺居之。是年，明烏斯藏暨長河西魚通甯遠董  
卜韓胡諸指揮宣慰司獻敕印。請內附。

十年正月。

賜宴達賴喇嘛于太和殿。

賚金幣鞍馬二月。

詔和碩親王碩塞率八旗兵送達賴喇嘛至岱汗。四月，  
遣官齎金冊印封達賴喇嘛爲西天大善自在佛領天

下釋教普通鄂齊賴達喇達賴喇嘛

十三年闡化王遣僧嘉穆錯諾爾布等貢方物先是索諾穆拉什至

詔闡化王納明所給敕印比年凡四遣使至是獻舊玉印一及敕書稱闡化王舊爲土伯特國主藏巴襲之顧實汗戕藏巴以闡化王歸達賴喇嘛轉給第巴第巴因有闡化王敕印詭遣邊內安島人稱闡化王貢使

詔改授闡化王敕印復

賜書達賴喇嘛詰第巴罪

十七年達賴喇嘛班禪喇嘛鄂齊爾汗表貢方物

遣官存問。

賚雕鞍玉壺等物。

十八年達賴喇嘛請市茶北勝州。

允之。

康熙九年鄂齊爾汗卒。

賜賻祭子朋素克嗣號達賴汗。

十四年達賴喇嘛遣使代逆藩吳三桂乞降。

敕曰吳三桂初叛時朕遣使往諭喇嘛大兵分路進剿若吳三桂竄赴唐古特當卽擒獻喇嘛奏稱吳三桂曾取延打木結達木二城乃三噶爾瑪地今旣發兵攻取

防守沿邊若欲徵兵深入惟候詔旨達賴巴圖台吉已自唐古特遣赴青海令其有事相援無事則鈐東部衆朕思喇嘛崇尚信義必如所奏而行因以青海蒙古進兵故傳諭滇蜀二省達賴巴圖台吉解松潘路險未卽赴喇嘛又奏稱蒙古兵雖強得城池恐貪據且西南地熱風土不宜若吳三桂勢窮悔罪乞免死允降吳三桂背恩謀逆罪不容誅朕豈容伊爲裂土罷兵請又靖逆將軍張勇等奏稱青海蒙古入邊侵擾蓋以叛鎮王輔臣倡亂甯羌故也今西陲已晏然無事喇嘛宜恪守前言令達賴巴圖爾台吉等統轄部衆毋得滋事擾民

二十二年達賴喇嘛示寂第巴匿不奏嗣是殘喀爾喀及噶爾丹就滅皆第巴爲之噶爾丹幼棄家依達賴喇嘛後歸準噶爾詭言達賴喇嘛授已博碩克圖汗號以所居阿爾台鄰喀爾喀牧謀侵之未幾喀爾喀右翼札薩克圖汗成袞與左翼土謝圖汗察琿多爾濟構釁達賴喇嘛遣札爾布奈定盟察琿多爾濟不從成袞子沙喇惲于

朝

敕達賴喇嘛擇使善輯喀爾喀達賴喇嘛奏唐古特以噶爾丹西勒圖爲尊遣之往蒙古謂喇嘛坐牀者爲西

勒圖蓋喇嘛大弟子也而喀爾喀哲卜尊丹巴呼圖克圖亦奉

詔赴盟壇與議哲卜尊丹巴呼圖克圖者土謝圖汗弟也偕噶爾旦西勒圖集喀爾喀兩翼汗濟農諾顏台吉宣

諭定盟噶爾丹偵哲卜尊丹巴呼圖克圖與噶爾旦西勒圖並坐詰責之因構兵土謝圖汗不敵偕哲卜尊丹巴呼圖克圖挈部內附

上以喀爾喀厄魯特奉達賴喇嘛教

申命遣使罷兵第巴燭噶爾丹侵喀爾喀索哲卜尊丹

巴呼圖克圖。

二十九年噶爾丹詭爲達賴喇嘛表。偕唐古特厄魯特汗台吉請上

尊號。

諭曰。朕聞喀爾喀部兄弟不睦。遣使達賴喇嘛諭令兩翼歸好。達賴喇嘛遣噶爾且西勒圖往。不能仰體朕心。及達賴喇嘛意。雖已和喀爾喀。而喀爾喀與厄魯特相仇之故。實從此起。後聞交惡興戎。卽遣使達賴喇嘛所。達賴喇嘛遣齊緝克塔賴堪布等往。卒不能諭止之。聽其縱戰。喀爾喀爲所敗。朕復遣使達賴喇嘛所。諭令定

盟息兵。達賴喇嘛遣濟隆呼圖克圖。朕遣伊拉古克三呼圖克圖往說之。詎意伊等不行諭止。反令闖入邊汎。朕出兵問罪。伊等立視其戰。我軍不得已而擊之。致厄魯特敗遁。朕與達賴喇嘛期于撫育眾生。而使臣故違意旨。至于如此。如能令厄魯特與喀爾喀修好。朕尚欲加達賴喇嘛嘉號。此皆任事行人不能仰副朕心。及達賴喇嘛意。致喀爾喀殘破。厄魯特喪敗。朕心實爲隱痛。復何尊號之可受乎。其以是諭達賴喇嘛及諸汗台吉等來使貢物。著并發還。

三十年。以收撫喀爾喀全部。

諭達賴喇嘛知之。

三十二年，達賴喇嘛使至，有巴圖爾額爾克濟農和囉理者，青海和碩特族也。游牧西套，避噶爾丹侵來歸。賜居阿拉善，尋叛復悔，罪至策妄阿喇布坦爲噶爾丹從子修怨噶爾丹第巴忌之。奏和囉理安置青海，保無盜賊。厄魯特眾半附策妄阿喇布坦。若生亂端，何以禦之？唐古特舊市打箭鑪，請勿禁。聽內地民與蒙古互市。

敕曰：和囉理以困窮來歸朕，優恤之使居阿拉善，乃忘朕蒙養恩，妄生猜疑，奔竄他所。今窮而復歸，朕復宥罪。

安置并無欲得其利.欲用其力之心也.今爾欲和囉理游牧青海.何不卽遣人遷往.爾又言策妄阿喇布坦恐生亂端.目前并無妄爲之事.苟有此等事端.其時自當從公裁度.爾又奏打箭鑪交市之事.殆欲屯戍意也.爾與朕一道同風.歷年已久.如爾設立駐防.朕必量增戍卒.况我內地兵丁約束甚嚴.未嘗私出邊境.爾但嚴禁屬眾.戍兵之設可無用也.達賴喇嘛尋奏年邁.事皆決第巴請給之爵.

詔封第巴爲土伯特國王.以達賴喇嘛辭異前奏.遣使往察.不得狀.

三十四年

諭召班禪喇嘛來朝第巴與噶爾丹陰阻之

三十五年班禪喇嘛使至稱避痘達賴汗奏貽書勸赴召不之從會

上親征噶爾丹俘降眾得第巴奸狀

諭達賴喇嘛班禪喇嘛知之復

敕獎達賴汗曰爾自顧實汗以來與本朝和協同心專  
尙宗喀巴道至汗身益誠信不渝頃噶爾丹陽護宗喀  
巴法陰爲悖逆邪行朕親統大兵剿滅之第巴乃達賴  
喇嘛下司事之人反不遵達賴喇嘛教惟爾汗敬待朕

使豫以噶爾丹事奏聞朕知爾不忘舊好甚堅且專凡悖壞教法煽誘噶爾丹者爾汗殆知之特遣使往以示褒善貶惡之意

敕責第巴曰爾陽奉宗喀巴教陰與噶爾丹比以久故之達賴喇嘛詐爲尙存遣濟隆呼圖克圖至噶爾丹所烏蘭布通之役爲擇戰日朕遣人往召班禪喇嘛爾又謂噶爾丹將要殺之不遣行青海博碩克圖濟農與噶爾丹結姻又不舉發爾果能改過仍思遵宗喀巴道奏明達賴喇嘛已故始末尊奉班禪喇嘛使赴朕召執獻濟隆呼圖克圖及博碩克圖濟農子所娶噶爾丹女朕

仍待汝以尊崇禮不然朕必問爾欺達賴喇嘛助噶爾丹罪爾向對朕使言四厄魯特爲爾護法主爾其召四厄魯特助汝朕將觀何如也

三十六年第二巴疏詭稱達賴喇嘛存令其使尼麻唐呼圖克圖密奏達賴喇嘛示寂恐唐古特生變故隱期今第六世靜體已十五年乞

念唐古特眾勿遽宣

遣理藩院主事保住等齋

敕諭曰朕數年來久知達賴喇嘛已故今爾輸誠密奏朕不欲摘發隱私傾人家國嗣當益加恭順勿違朕旨

保住等行我使自策妄阿喇布坦所歸言西北諸厄魯特知達賴喇嘛示寂久第巴阻策妄阿喇布坦兵令勿剿噶爾丹復煽青海諸台吉私盟。

詔保住等往視新達賴喇嘛嚴詰第巴罪第巴奏策妄阿喇布坦自撤兵非臣阻青海諸台吉懼噶爾丹侵備兵盟第六世達賴喇嘛尙坐禪濟隆呼圖克圖請勿壞身命班禪喇嘛將赴召噶爾丹女乞仍給博碩克圖濟農子。

賜敕詰責濟隆呼圖克圖尋械至禁之班禪喇嘛奏學淺不敢赴召博碩克圖濟農子察罕丹津奏請免獻噶

爾丹女乃

允之是年達賴汗遣使慶征噶爾丹捷子拉藏以建達  
賴喇嘛塔故赴青海聞

上招撫使至偕諸台吉內附達賴汗卒拉藏嗣第巴惡  
之初第巴與策妄阿喇布坦讐噶爾丹既滅第巴策妄  
阿喇布坦畏

天朝威各卑詞乞命然皆貌恭順懷不靖志策妄阿喇  
布坦詭遣使赴青海聲言兵擊第巴奏第巴壞宗門敎  
禁班禪喇嘛僞立達賴喇嘛名羅卜藏琳沁策旺嘉穆  
錯者惑諸蒙古恐將滋變

上燭其奸。

諭廷臣曰策妄阿喇布坦由博囉塔拉至土伯特必經喀拉烏蘇等處路徑險惡斷不能往若悉眾大舉則附近哈薩克布魯特諸部相仇殺無留護妻孥者若兵單力弱斷難成事惟有奮激而行妻孥與俱幸濟則已否則有歸附土伯特之謀耳其意特張虛聲欲觀青海動靜未必果欲爭戰也策妄阿喇布坦果寢兵第巴計毒拉藏不死以兵逐之拉藏因集唐古特眾執殺第巴奏至

敕封輔教恭順汗

諭獻第巴所立達賴喇嘛使至策妄阿喇布坦遣人往迎拉藏不予復不以獻

諭曰達賴喇嘛存日六十年來塞外不生一事及身故後第巴誘噶爾丹妄行不靖朕觀奏詞非復昔日語氣遣使細訪乃盡得欺詐狀蒙古素崇佛教有達賴喇嘛名皆皈嚮之倘爲策妄阿喇布坦所迎歸則西藏蒙古皆向策妄阿喇布坦矣拉藏今雖不從朕命後必執之來獻

四十六年拉藏汗獻第巴所立達賴喇嘛羅卜藏琳沁策旺嘉穆錯道死復立博克達之阿旺伊什嘉穆錯爲

達賴喇嘛初唐古特人索諾木達爾札其妻曰羅卜藏吹木索有子二長羅卜藏噶勒藏嘉穆錯次恭格丹津羅卜藏噶勒藏嘉穆錯幼慧甚唐古特眾及青海諸台吉敬事之拉藏汗旣立博克達之阿旺伊什嘉穆錯爲達賴喇嘛聞其名忌之將以兵戕索諾木達爾札禡負走乃免青海諸台吉以不辨眞僞爭

詔遣官往視拉藏汗奏以班禪喇嘛言置禪榻王大臣等議拉藏汗與青海諸台吉隙請遣官理藏務

詔侍郎赫壽往

四十九年班禪喇嘛拉藏汗奏云阿旺伊什嘉穆錯諳經

典青海諸台吉信之請給冊印。

詔封第六世達賴喇嘛撒赫壽歸青海諸台吉許拉藏汗辭誣以裏塘之羅卜藏噶勒藏嘉穆錯爲眞達賴喇嘛瑚畢勒罕。

詔詢班禪喇嘛如拉藏汗言青海諸台吉復固爭上以不輯之將構難。

遣官檄集盟壇示班禪喇嘛印文。

諭徙羅卜藏噶勒藏嘉穆錯置內地以索諾木達爾札護居西甯宗喀巴寺青海貝勒察罕丹津台吉羅卜藏丹津等稱避痘不宜遠行初議送紅山寺繼請送西甯

宗喀巴寺卒不遣且以兵脅異己者。

詔大軍備之乃懼送羅卜藏噶勒藏嘉穆錯至宗喀巴寺。

五十六年。偵準噶爾潛兵赴藏。

詔赫壽遺書拉藏汗曰。將軍富甯安等擒準噶爾哨卒。言拉藏汗子娶策妄阿喇布坦女已三年。且生子。策妄阿喇布坦遣其將策凌敦多卜及托卜齊都噶爾三都克等率兵往阿里克。或策妄阿喇布坦兵至。俱未可定。爾旣受我

主封食我

主祿而侵我邊部。我川兵三萬餘。豈有聽爾臨諾。穆汗烏巴什穆嚕烏蘇境。侵青海之理乎。彼時助察罕丹津等與爾戰。悔無及矣。蓋拉藏汗自仇殺第巴後。使貢不絕。策妄阿喇布坦忌之。語哲卜尊丹巴呼圖克圖使。拉藏汗嗜酒無謀。詭議姻。拉藏汗子三長噶爾丹。丹忠。次索爾札。次色布騰。策妄阿喇布坦以女博托洛克爲噶爾丹。丹忠婦來娶。留不遣。

上聞之。

諭歸拉藏汗子。不從。西域謂善巫蠱者曰鮓苔。噶爾丹忠習其術。策妄阿喇布坦誘縛之。夾兩金間焰死。遣

兵六千襲藏詭稱噶爾丹丹忠及博托洛克歸拉藏汗前以爭達賴喇嘛與青海諸台吉違言事甫定準噶爾兵赴藏

上疑之或拉藏汗煽策妄阿喇布坦搆兵也青海尋以準噶爾侵拉藏汗告

詔荊州太原駐防兵赴成都西安以署西安將軍額倫特屯西甯都統和禮屯雲南護軍統領溫布屯打箭鑪侍衛色楞宣

諭青海諸台吉備兵時策凌敦多卜率津噶爾衆由特幾斯踰淨科爾庭山拉藏汗不之備賊至達木始覺偕

子索爾札拒不敢奔守布達拉遣使齋疏乞援賊誘噶  
卜倫沙克都爾札卜唐古特台吉納木札勒等開布達  
拉門入戕拉藏汗拘色布騰及宰桑等禁阿旺伊什嘉  
穆錯于札克布里廟索爾札率兵三千餘潰走爲所擒  
其妻間道來奔

詔安置博囉充克克優養之

五十七年拉藏汗疏始至

詔額倫特色楞往援失利從兵或爲準噶爾所掠策凌  
敦多卜復誘裏塘營官喇嘛等赴藏裏塘外日布巴塘  
而察木多而乍雅而巴爾喀木皆距近

五十八年都統法喇奉

詔屯打箭鑪奏裏塘至唐古特咸敬瑚畢勒罕請移打  
箭鑪兵屯裏塘相機剿準噶爾復令索諾木達爾札諭  
營官喇嘛等使知駐兵裏塘乃

聖主保護瑚畢勒罕鄉眾至意裏塘外諸境可傳檄定  
詔可乃進屯裏塘第巴色布臘阿住達瓦喇木札木巴  
等抗不就撫誅之傳檄巴塘察木多乍雅各籍其土及  
民數復

詔自打箭鑪進屯巴塘策凌敦多卜懼送所掠兵自巴  
爾喀木歸言唐古特時有瘴準噶爾難久處羅卜藏噶

勒藏嘉穆錯唐古特眾僉稱爲眞達賴喇嘛若置禪榻  
善甚

命撫遠大將軍固山貝子允禩宣

諭青海台吉等從大將軍入藏羅卜藏噶勒藏嘉穆錯  
奏隨地可置禪榻興大兵恐擾眾王大臣等以藏地遠  
且險不決進兵議

五十九年

諭曰策凌敦多卜聞我師至自必望風遠遁俟定立法  
教後或暫留兵守視或久鎮其地唐古特眾皆如我兵  
準噶爾至以逸待勞何難剿滅西甯至四川雲南境外

土番錯處。西藏皆土番族。若策凌敦多卜侵據藏地。唐古特眾卽爲準噶爾兵。邊疆土番復安能保全耶。喀爾喀及青海俱服朕風化。準噶爾乃侵據藏地。青海台吉。理應棄命忘身。乃口稱維持黃教。乏實心效力人。朕思策凌敦多卜兵遠道衝雪。尙能至藏。我兵獨不能赴乎。此時若不安藏。賊益無所忌憚。安藏大兵。決宜前進。

詔封羅卜藏噶勒藏嘉穆錯爲宏法覺眾第六世達賴喇嘛。

賜金冊印。以護軍統領噶爾弼爲定西將軍。都統延信爲平逆將軍。率青海及內札薩克喀爾喀阿拉善兵。護

達賴喇嘛行。噶爾弼自拉里進擊。準噶爾等桑春不勒  
於章來爾戎抵墨朱工喀。第巴達克咱喇嘛鍾科爾等  
迎降。集皮船渡宣

諭大小第巴及各寺喇嘛封達賴喇嘛倉庫斷賊糧道。  
唐古特人康濟鼐集唐古特兵。偵賊走多特。追擊之。斬  
獲甚衆。誅所置喇嘛總管等。延信自青海進敗。準噶爾  
于卜克河齊諾郭勒綽瑪喇賊由克底雅遁。軍抵藏。出  
阿旺伊什嘉穆錯於禁所廢之。蓋自第五世達賴喇嘛  
示寂後。幾四十年。第六世達賴喇嘛始定。先是準噶爾  
賊未至藏。

道理藩院主事勝住喇嘛楚爾沁藏布喇木占巴等往圖地域至是大兵入諸番內附

上以山川名漢番異稱

命大學士九卿等詳考西南徼外輿地

六十年敘唐古特迎降功封第巴康濟鼐阿爾布隆固山貝子隆布鼐輔國公理前藏務頤羅鼐札薩克一等台吉理後藏務各授噶卜倫

御製平定西藏碑建伊克昭文曰昔者

太宗文皇帝崇德七年班禪額爾德尼達賴喇嘛額實

汗謂東土有

聖人出特遣使自人跡不至之區經仇敵之國閱數年始達盛京至今八十載同行善事俱爲施主頗極安甯後達賴喇嘛之歿第巴隱匿不奏者十有六年任意妄行拉藏滅之復興其法因而允從拉藏青海羣眾公同之請中間策妄阿喇布坦妄生事端動準噶爾之眾肆行奸詐滅壞達賴喇嘛并廢第五輩達賴喇嘛之塔辱噶班禪毀壞寺廟殺戮喇嘛名爲興法而實滅之且欲竊據土伯特國朕以其所爲非法爰命皇子允礪爲大將軍又遣朕子孫等調發滿洲蒙古綠旗兵各數萬歷烟瘴之地士馬安然而至賊衆三次乘夜盜營我兵奮

力擊殺賊皆喪膽遠遁一矢不發平定西藏振興法教  
賜今瑚畢勒罕冊印封爲第六輩達賴喇嘛安置禪榻  
撫綏土伯特僧俗人眾各復生業于是文武臣工咸謂  
王師西討歷瘴癟險遠之區曾未半載輒建殊勲實從  
古所未有而諸蒙古部落及土伯特酋長亦合詞奏曰  
皇帝勇畧神武超越往代天兵所臨邪魔掃蕩復興蒙  
古向所尊奉法教喀木藏衛等部人眾咸得拔離湯火  
樂土安居如此盛德大業非臣下頌揚所能宣罄請賜  
御製碑文鐫勒昭地以垂永久朕何功焉而羣眾勤請  
不已爰紀斯文立石西藏俾中外知達賴喇嘛等三朝

恭順之誠諸部落累世崇奉法教之意朕之此舉所以除逆撫順綏眾興教云爾

雍正元年

詔給第六世達賴喇嘛冊印文視第五世達賴喇嘛別賜敕司噶卜倫務

二年大軍討青海叛賊羅卜藏丹津誅助逆喇嘛等諭曰喇嘛助羅卜藏丹津爲逆糾數千餘眾以致追剿覆滅玷辱法教甚矣前準噶爾據唐古特戮僧徒燬寺廟大軍往討之恢復昭地法教振興如此隆恩不知感激反助悖逆尙可謂遵奉法教者乎其以此諭喇嘛等

知之。

三年撤大軍還以康濟鼐總藏務阿爾布巴副之王大臣等奏阿里形勝地康濟鼐旣駐藏請令擇代理阿里務者康濟鼐遵

旨議以其兄喀錫鼐色布登喇什爲阿里總管撫遠大將軍年羹堯請令康濟鼐專居藏地

上察阿爾布巴等與康濟鼐異志

諭曰若令康濟鼐孤身在藏阿爾布巴等不之服康濟鼐雖欲效忠勢必不能仍令兩處往來行走兼理藏及阿里務爲善先是達賴喇嘛赴藏索諾木達爾札偕行

既娶隆布鼐女二，隆布鼐恃達賴喇嘛姻，忌康濟鼐。諸噶卜倫由是不相能。川陝總督岳鍾琪奏：打箭鑪外裏塘巴塘乍雅察木多中甸請隸內地給頭目等土司職。察木多外魯隆宗雜哇坐爾剛桑噶吹宗袞卓諸部距打箭鑪遠，內地遙制不便。請隸唐古特，以噶卜倫康濟鼐阿爾布巴理之。

遣副都統鄂齊往。

諭達賴喇嘛。

四年鄂齊奏：達賴喇嘛幼，康濟鼐恃績，蔑視諸噶卜倫。阿爾布巴、隆布鼐等陰險，黨札爾鼐附之，恐構達賴喇

嘛與康濟鼐不睦。請罷隆布鼐札爾鼐翦阿爾布巴翼，  
諭達賴喇嘛偕康濟鼐阿爾布巴和衷。有袞都阿喇木  
巴者羅卜藏吹木索弟也。善翼視達賴喇嘛。

賜達爾漢號復

詔設駐藏大臣以副都統瑪拉內閣學士僧格往。

五年，瑪拉等至藏。阿爾布巴隆布鼐札爾鼐陰以兵戕  
康濟鼐叛，遣賊黨侵阿里。喀錫鼐色布登喇什以義不  
反兵，驟擊之，戰歿。其長子噶錫巴納木札勒色布騰從  
台吉頗羅鼐集後藏兵拒賊，卻走。將往擊之，馳奏乞援。  
詔左都御史查郎阿率兵萬五千餘赴藏。亂作，瑪拉等

以諾顏和碩齊轉喀拉烏蘇兵護唐古特眾奏請  
賜爵

詔授札薩克一等台吉

六年頗羅鼐謀大軍將至集後藏及阿里兵九千自潘  
玉口馳赴前藏聞瑪拉等駐拉薩護達賴喇嘛遣兵助  
召諸寺喇嘛擒阿爾布巴隆布鼐札爾鼐等送瑪拉所  
查郎阿至誅阿爾布巴等及其孥請留兵二千駐藏徙  
達賴喇嘛居裏塘

允之以札薩克貝子頗羅鼐領後藏務轉阿里圖底斯  
境

諭給銀三萬賞從兵頗羅鼐請以車駕旺札勒協理藏務

詔授札薩克一等台吉兼噶卜倫查郎阿將撤大軍還奏舊設噶卜倫理前藏務今藏地初定頗羅鼐爲眾服請令兼領前藏

從之

諭曰前用兵西藏時頗羅鼐甚爲效力其後噶卜倫等嫉妬爭權阿爾布巴隆布鼐等潛結匪類公然肆惡擅殺朝廷敕封貝子總理事務之康濟鼐并欲害及頗羅鼐頗羅鼐奏聞逆黨罪狀朕遣大軍領兵前往察詢情

由分別治罪頗羅鼐聞大軍將至率眾奮勇前馳直抵  
藏地阿爾布巴等力屈勢窮被各寺喇嘛擒獻大臣至  
彼盡得悖逆妄亂之情已將阿爾布巴及叛逆等盡行  
殲誅自此黃敎可興番眾可輯頗羅鼐深知大義討逆  
鋤奸俾無辜受害者得雪沈冤背惡肆行者早正刑辟  
甚屬可嘉著封爲固山貝子以獎義勇以昭國憲

上憫康濟鼐無嗣

詔追授其兄喀錫鼐色布登喇什爲一等台吉長子噶  
巴納木札勒色布騰襲爵

賞孔雀翎

詔徙達賴喇嘛居裏塘索諾木達爾札代達賴喇嘛來朝奉表貢物

賜珊瑚項雙眼孔雀翎復

諭曰索諾木達爾札訓示達賴喇嘛學習經典保護多方西藏諸務毫不干豫甚屬可嘉著封爲輔國公岳鍾琪奏移化林兵五百往護復以兵四百屯噶達西吹音堡及鴉籠江上中下三渡尋徙泰甯四川總督黃廷桂奏泰甯距打箭鑪道險舊屯兵五百不給防禦請增兵如數令與西藏裏塘巴塘互犄角

從之大軍之討阿爾布巴噶爾丹策凌使至奏請赴藏

煎茶

上不允

七年達賴喇嘛至裏塘建噶達寺居之將

遣兵討準噶爾

諭曰策妄阿喇布坦假黃敎爲名潛兵入藏無故殺拉  
藏汗遣使往討復敢阻兵抗命其後策妄阿喇布坦身  
故子噶爾丹策凌遣使至奏稱欲使眾生樂業黃敎振  
興噶爾丹策凌不過一微末台吉此豈伊應出語耶且  
西藏阿爾布巴隆布鼐札爾鼐等濟惡同謀皆以準噶  
爾鄰伊地青海叛賊羅卜藏丹津係伊等姻戚彼此相

依審迫時必往投之。頗羅鼐勇往直前，截賊去路。阿爾布巴等未得前進，輒被擒。準噶爾若仍留游牧，將來青海及西藏地，必受其害。此朕所熟思而審處者也。

八年，僧格偕頗羅鼐以兵千五百屯騰格里諾爾，以頗羅鼐子珠爾默特策布登統阿里諸路兵，防準噶爾賊。保唐古特。

詔授札薩克一等台吉。

九年，一等台吉噶錫巴納木札勒色布騰表謝

恩，獻方物。

諭曰：前以喀錫鼐色布登喇什陣亡阿里，經頗羅鼐奏

請特贈一等台吉其子噶錫巴納木札勒色布騰襲之  
邇聞爲國效力辦理事務亦善且爲康濟鼐兄子康濟  
鼐宣力有年抒誠報效始終不懈并無子嗣著將噶錫  
巴納木札勒色布騰格外施恩封授輔國公世襲罔替  
尋授噶卜偷布魯克巴部諾顏琳臣齊壘喇布濟喇嘛  
札爾西里布魯克額濟噶碧棟嚕布等納貢

諭曰朕爲天下主一視同仁無分中外乃者附近帕爾  
城之布魯克巴人等起釁構兵互相讐殺朕聞之甚不  
忍頗羅鼐仰體朕意與班禪喇嘛遣使往諭朝廷恩德  
布魯克巴人等感悟息爭敬順無違且請施恩訓誨朕

甚嘉悅。嗣此恪守疆界，共相和睦。永遵釋教，祇奉恩綸。朕自益加優眷，復以頗羅鼐招撫功。

詔晉封多羅貝勒，總理衛藏噶卜倫務。

諭嘉札薩克一等台吉珠爾默特策布登奮勇效力。晉封輔國公。

賜敕印班禪喇嘛尋偕頗羅鼐助駐藏軍糧瑪拉卻之。復固請。

詔給如值，以軍餉足，不煩獻助。宣

諭先是準噶爾掠索爾札色布騰禁之。哲卜尊丹巴呼圖克圖說策妄阿喇布坦獻謝罪。不從。子噶爾丹策凌

嗣給索爾札戶十，詭稱將遣歸唐古特，頗羅鼐聞之，以告。

諭曰：準噶爾戕拉藏汗，掠其子索爾札等歸。今稱遣還西藏，不可不嚴爲防備。前策妄阿喇布坦，遺策凌敦多卜，襲西藏時，誑稱噶爾丹丹忠偕其女歸，乘拉藏汗不備，襲唐古特地。今遣歸索爾札之言，正噶爾丹策凌奸計。若唐古特少爲玩忽，卽蹈前策凌敦多卜故轍矣。準噶爾旣殺拉藏汗，豈肯令其子索爾札歸藏襲爵？唐古特現有訓練蒙古兵，爾其與駐藏大臣等定議，設汛阿里哲斯、宣圖魯克勒底雅等處，協力防禦。準噶爾若以

兵隨索爾札至可卽迎擊之索爾札父兄被人殺害焉  
有不忿恨之理若果思報仇感戴朕恩率屬來歸爾等  
自可悉心安頓至若立汗之事當令達賴喇嘛班禪喇  
嘛奏聞于朕方可建之豈可令噶爾丹策凌任意妄行  
久之索爾札不至後大軍定準噶爾色布騰及索爾札  
子納噶察始來歸附收察哈爾旗

十年拉達克汗德忠納木札勒奏臣理國事尊釋教慎  
準噶爾情輒以告乞

賜恩綸

敕曰爾父尼瑪納木札勒偕貝子康濟鼐同心報效前

已大沛恩膏今爾亦效爾父與貝勒頗羅鼐一體效力甚屬勤勞嗣當益加勉勵以紹前徽僧格奏巴勒布部雅木布卓稜庫庫木三汗慕

聖德遺貢請觀

上憫其道遠

敕曰爾汗慕朕仁化萬里輸誠朕甚嘉悅納所進方物第念道路遙遠往返維艱爾使卽由西藏遣歸爾汗但與貝勒頗羅鼐協力和衷維持黃教以副朕普育羣生至意

十一年

諭曰·西藏駐劄弁兵本爲保護唐古特眾·防範準噶爾設比來賊眾敗竄不能復涉藏地·頗羅鼐抒誠效力·唐古特兵皆訓練壯勇·目今藏地無事·兵丁多集·米穀錢糧雖給自內地·唐古特不無解送勞著·量留守藏兵五百餘盡撤還·前令達賴喇嘛移駐秦甯·因唐古特有阿爾布巴等事·恐準噶爾乘間來犯·其從至弟子·久違鄉土·各懷歸志·班禪喇嘛現復年邁有疾·著仍遷達賴喇嘛歸藏·

十三年輔國公索諾木·達爾札從達賴喇嘛歸藏·

皇朝藩部要略卷之十八

前史官壽陽

祁韻士

纂

寶山

毛獄生

編次

江陰

宋景昌

校寫

平定

張 穆

覆審

西藏部要略二

乾隆元年布魯克巴部諾顏琳臣齊壘喇布濟等奉表  
貢札薩克一等台吉諾顏和碩齊卒駐藏副都統瑪拉  
等奏岱頗羅鼐議代領喀拉烏蘇兵者頗羅鼐子珠爾  
默特納木札勒歲領塔木騰格里諾爾兵防汎塔木距

喀拉烏蘇邇可令兼轄諾顏和碩齊所遺札薩克一等台吉其弟車臣哈什哈現理古木布木務請令襲爵允之

三年拉達克汗遣獻方物各

賜敕獎

四年駐藏副都統杭奕祿奏巴勒布三汗邇構兵臣遣頗羅鼐諭輯之咸聽命獻所部民數

詔優賚復以頗羅鼐績晉封多羅郡王噶爾丹策凌請

赴藏煎茶

諭曰朕爲天下大君不阻奉教之人爾準噶爾前曾潛

往藏地擾害土伯特眾今若徑赴彼地土伯特或懷憤滋事爾果誠心布施朕當遣兵護往既而準噶爾煎茶使道棟科爾以爭市值不果往

詔責違信罪噶爾丹策凌遣謝固申前請

允之是年輔國公一等台吉噶巴納木札勒色布騰卒弟班第達襲

五年札薩克一等台吉車臣哈什哈卒弟齊旺多爾濟襲

八年準噶爾煎茶使至藏謂頗羅鼐曰聞拉達克言土伯特黃教盛今信然噶勒招穆倫河濱舊設溫都遜喇

嘛禪樹噶爾丹策凌乞代葺準噶爾乏諳經典喇嘛乞  
給我擣歸聞唐古特不善騎且乏軍械今觀之武備稍  
勝頗羅鼐語之曰

大皇帝闡黃敎輯眾生以故土伯特富庶甚爾等至藏  
煎茶賞馬駝路費令極裕此皆恭順

天朝所致土伯特以準噶爾襲始嚴武備我蒙  
恩統藏務簡兵繕械有侵圉者足禦之矣所請修廟延  
僧事非奉

旨安敢擅行準噶爾使唯而退

諭獎頗羅鼐應使得體

賚幣噶爾丹策凌忌之。訐頗羅鼐不善理煎茶務。

諭曰：頗羅鼐奏準噶爾眾有侵害土伯特讐喇嘛等不願前往，故不之給。爾奏頗羅鼐念拉藏汗仇，辦給爾使諸物俱未協。朕爲大君，不分內外。頗羅鼐與爾等皆僻處遠地，彼此互有違言。朕豈有偏聽爾遽罪頗羅鼐乎？復

詔駐藏副都統傅清等偕頗羅鼐議防準噶爾。珠爾默特策布登以兵五千駐防阿里克。

九年，準噶爾使自藏歸。珠爾默特策布登班第達齊旺多爾濟以協頗羅鼐理準噶爾煎茶務並。

賜幣獎珠爾默特策布登會病足自阿里歸藏是年輔  
輔國公索諾木達爾札卒

諭曰索諾木達爾札係達賴喇嘛父

皇考加恩達賴喇嘛特予封爵伊亦深感

皇考恩行走謹慎歷十有餘年著加恩令伊子恭格丹  
津仍襲輔國公爵以示優眷

十年

詔駐藏大臣三年一代札薩克一等台吉齊旺多爾濟  
卒駐藏副都統傅清等奏頗羅鼐請以諾顏和碩齊子  
旺對襲

諭曰伊係舉家受恩之人令其辦理諸務自爲有益諾  
顏和碩齊受國厚恩授爲札薩克一等台吉伊弟相繼  
承襲亦各奮勉效力今齊旺多爾濟病故著照所請以  
其兄諾顏和碩齊子旺對承襲札薩克一等台吉

十一年

諭頗羅鼐曰爾素效忠誠勤勞懋著自朕御極以來悉  
心靖共凡事竭力奮勉辦理妥協甚屬可嘉著加恩于  
爾子內封一長子日後承襲王爵總理藏務所係甚要  
其善擇才堪嗣爾悅服眾心裨益公務者以聞頗羅鼐  
子二長珠爾默特策布登次珠爾默特納木札勒珠爾

默特策布登病足以長子讓弟珠爾默特納木札勒詭  
讓兄頗羅鼐愛少子請以珠爾默特納木札勒爲長子  
允之

上嘉珠爾默特策布登之讓

諭曰珠爾默特策布登雖有疾前曾出兵效力著加恩  
封鎮國公頗羅鼐善服眾爲諸噶卜倫所敬事有綏奔  
喇嘛札克巴達顏者書其名瘞訛之事覺頗羅鼐欲弭  
變輕議綏奔喇嘛札克巴達顏罪

上嘉之

諭鎮壓左道不足患其借達賴喇嘛協輯唐古特眾

十二年珠爾默特策布登疾痊駐藏副都統傅清等請遣屯阿里克汎

允之準噶爾使再入藏煎茶駐藏副都統傅清等遣車稜旺札勒以喀拉烏蘇兵三百監之遣旺對領兵設汎阿哈雅克阿里克路班第達協頗羅鼐總理諸務頗羅鼐卒

遣官賻祭以珠爾默特納木札勒襲郡王爵兼理衛藏噶卜倫務

諭傅清曰珠爾默特納木札勒不更事或未服唐古特眾且頗羅鼐以暴疾亡珠爾默特納木札勒或以綏奔

喇嘛札克巴達顏故與達賴喇嘛構隙不肖眾起而間之不無滋事虞爾其留意體察導珠爾默特納木札勒任用舊人復以協理藏務當如頗羅鼐存日宣諭眾噶卜倫知之會準噶爾台吉策妄多爾濟納木札勒復遣使赴藏煎茶入寺詭避痘以已卒守門不令官兵從上以準噶爾狡甚

飭嚴防雖歸巢勿稍忽珠爾默特納木札勒奏藏地謐無事請撤官兵歸

上念頗羅鼐有安藏功且蒙恩厚珠爾默特納木札勒必無異志不從撤兵請適滋疑不如示之信

詔可。

諭達賴喇嘛嗣勿令準噶爾入藏雖固請弗允珠爾默特納木札勒訛稱準噶爾眾襲唐古特至碩翁圖庫爾遣兵備喀拉烏蘇徙達木番眾不數旬揚言準噶爾至阿哈雅克自率兵往備駐藏提督索拜遣旺對赴喀拉烏蘇備之比至無蹤

上聞之

詔撤喀拉烏蘇兵及達木番歸牧勿惑眾

十三年準噶爾使自藏歸諸噶卜倫並

賜幣獎

詔授班第達兄噶錫巴納木札勒色布騰子巴桑車凌爲一等台吉

諭曰昆弟子姓世受國恩嗣益勉無怠初郡王頗羅鼐以女妻班第達頗羅鼐卒班第達察珠爾默特納木札勒有逆志不之附珠爾默特納木札勒惡之奪其孥十四年駐藏副都統紀山劾珠爾默特納木札勒妄戾請檄珠爾默特策布登至協理藏務

上不允

諭紀山善導之勿露防範迹已而珠爾默特納木札勒以珠爾默特策布登發阿里兵將擾藏告蓋計陷之也

敕諭珠爾默特策布登爾父子昆弟受朕恩深重爾所素知爾今無故發兵是既負朕恩又玷辱爾父矣爾於兄弟之間素敦和好爾父爵尙讓爾弟襲今乃轉欲構兵取罪果爾兄弟不睦宜親身至藏以實情告辦事大臣及達賴喇嘛俟奏至朕議爾兄弟事務令永遠和睦如爾有欲奏言亦卽具奏朕自有措處也復

諭傅清曰珠爾默特納木札勒年幼躁急性好滋事若果無他故其兄欲進兵至藏是特兄弟間互相侵犯耳若其兄並無此事而伊造言誣構則宜相機辦理

十五年珠爾默特納木札勒以兵戕其兄珠爾默特策

布登于阿里。詭以兄暴疾聞。請收葬。并育兒子。

上允之。時珠爾默特策布登子朋素克旺布及珠爾默特旺札勒皆居後藏。珠爾默特納木札勒以兵往戕朋素克旺布。陽稱逃亡。珠爾默特旺札勒奔札什倫布。依班禪額爾德尼爲喇嘛。乃免駐藏都統傅清、左都御史拉布敦以珠爾默特納木札勒攜兵離藏告。蓋是時珠爾默特納木札勒忌其兄珠爾默特策布登。襲殺之。私攜礮至後藏。誣籍噶卜倫輔國公班第達及第巴布隆贊等。旋達木距前藏三百餘里。擁眾二千餘。不歸奏至。上不忍。卽誅之。

諭曰此或珠爾默特納木札勒以部眾不皆順擁兵自護且或因弟兄啟釁懼朕問罪妄意離巢穴可苟免此時惟應靜以鎮之待其自起自止在我原無治罪之心則彼亦不生猜疑之念也嗣傅清等密疏扳狀

詔俟副都統班第自青海赴藏討罪復

諭四川總督策楞提督岳鍾琪等馳兵往會而是時賊猖盛梗驛道軍書不達者旬日傅清偕拉布敦計不急誅賊必據唐古特爲變召珠爾默特納木札勒至待諸樓甫登起責其罪曰爾違

天子命且忘爾父無君無父罪不可赦傅清趨前扼其

臂拉布敦拔佩刀刺之。諭駁從閩治有羅卜藏札什者，  
趨下呼賊千餘突至，聚圍樓集，藁焚達賴喇嘛遣番僧  
往護，不得入。傅清拉布敦死之。先是傅清等將除珠爾  
默特納木札勒密與班第達謀，羅卜藏札什乘亂擾帑  
二萬餘挺走班第達復奔告達賴喇嘛集兵捕逆翼日  
擒禁之，遣番眾屯要汎，諭勿傷漢民。抗官軍達賴喇嘛  
善之，奏令班第達暫理藏務。時四川總督策楞等赴藏  
定亂。

諭曰：班第達不能救護駐藏大臣，念其勢孤力弱，尙屬  
無過，然亦無功可錄。但不附逆黨，猶知尊向天朝，著以

輔國公爵管理噶卜倫務應俟徐加恩賜策楞旣就道  
又

諭曰此措置唐古特一大機會也若經理得宜自可永  
遠甯謐否則久復別生事端珠爾默特納木札勒敢懷  
逆志萌于地廣兵強事權專一嗣此唐古特應多立頭  
目以分其勢爾等其詳議善後事宜爲一勞永逸計策  
楞等至藏礫珠爾默特納木札勒子達爾札策楞及羅  
卜藏札什奏傳清拉布敦誅逆被害狀

上召諭廷臣曰從前頗羅鼐實心恭順料理藏中事務  
一切安帖

皇考世宗憲皇帝屢次加恩由台吉封爲貝勒伊感激我朝厚恩彌益恪誠朕卽位以後封爲郡王後因頤羅鼐年力就衰朕詢伊二子之中孰堪爲嗣伊奏稱長子輒弱又已出家二子珠爾默特納木札勒人尙強幹能勝彈壓因令其承襲迨伊奏事一二次以後朕于其辭意之間卽知其非伊父居心可比日後必生事端諭駐藏大臣留心體察傳清前經駐藏爲伊等所信服遂令前往且慮其勢孤益以拉布敦協同駐藏乃珠爾默特納木札勒心益狡悖將長兄珠爾默特策布登圖害又與達賴喇嘛素有仇隙旣戕其兄遂欲計害藏中不順

伊之班第達等其勢將延及達賴喇嘛獨居其地雄長一方近遂將塘汎文書禁絕不通悖逆情形漸益昭著傳清拉布敦稔知其奸疏請便宜從事以絕後患於今年十月初八日奏到朕以僅二大臣孤懸絕域未可輕舉批令候班第更換拉布敦到藏日會同達賴喇嘛及藏中大噶卜倫等明正其罪以申國法乃傳清等未及接到諭旨卽于十月十三日傳珠爾默特納木札勒到通司圖加以誅戮而傳清拉布敦旋爲伊屬羅卜藏札什所害總督策楞奏到朕深爲憫惻不覺涕零因思傳清拉布敦若靜候諭旨遵行或不至是但珠爾默特納

木札勒反形已露，倘不先加誅戮，傅清等亦必遭其荼毒。則傅清拉布登之先幾籌畫，殲厥渠魁，實屬可嘉。非如霍光之誘致樓蘭而斬之也。夫臨陣捐軀，雖奮不顧身，然尙迫以勢所不得不然。如傅清拉布敦揆幾審勢，決計定謀，其心較苦，而其功爲尤大。以如此實心爲國之大臣，不保其令終，安能不倍加軫悼耶？傅清拉布敦著加恩追贈爲一等伯，入祀賢良昭忠祠，春秋致祭。傅清並入伊家祠從祀。伊等子孫，給與一等子爵，世襲罔替，以示朕褒忠錄庸之至意。並將伊二人爲國捐軀之大節，明白宣示，使天下共知其不得已之苦心。否則好

事喜功者借此二人爲口實而事外之無知人又議其擅開邊釁而仍邀國家如此厚恩者朕豈有令其是非倒置若此哉

十六年方亂時有清特古斯者屯兵阿里助珠爾默特納木札勒爲逆班第達誅之遣台吉集都鼐理阿里務給卓理克圖號事聞

諭策楞等曰班第達擅給台吉號儼以藏王自居今令管理噶卜倫務復命多立數人班第達或大失所望雖未必顯有抗違但其心稍恐不足務須明切導之以珠爾默特納木札勒恃有王爵擁勢太重釀成嫌隙今多

立噶卜倫正可保全終始令彼渙然疑釋庶可永甯策  
楞抵藏奏達賴喇嘛以鎮阿里要地必重名號故權給  
之班第達恭順可信臣遵

旨宣諭感且泣矢竭誠報效策楞等以珠爾默特納木  
札勒通準噶爾逆書聞

諭曰前駐藏都統傅清左都御史拉布敦因珠爾默特  
納木札勒逆謀顯著先事翦除奮不顧身忠誠卓越俱  
已加恩贈卹入祀賢良昭忠二祠傅清並入伊家祠從  
祀不知者或訾二人冒險邀功且議朕爲酬庸過厚也  
今據策楞班第等奏珠爾默特納木札勒自立名號潛

遣其心腹，迎款準噶爾，稱策妄多爾濟納木札勒爲汗，且求其發兵至拉達克地方，以爲聲援。幸值準噶爾內潰，遣使人回藏，被獲得其逆書，並餽敵諸物，是其陰蓄異志，勾結準噶爾，罪不容誅。設非二臣協力同心，決計先發，則其遺害藏地，將不可言。是二臣之心甚苦，而其有功于國家甚大，應特建雙忠祠，合祀二人，春秋致祭，不昭勸忠之典復。

御製雙忠詩紀之，有雙忠躋烈傳斯篇，他年以待信史編之句。是年策楞等議設駐藏兵五百，防汎兵千，自咱拉山至拉卜賽郡木，自阿哈雅至碩翁圖庫爾，各設汎

哨以達木番歸駐藏大臣轄視內地例置佐領驍騎校各職每年一察視設噶卜倫四以輔國公班第達札薩克台吉車稜旺札勒色玉特色布騰喇嘛尼瑪嘉穆錯任之別設代奔五第巴三堪布一分理藏務隸駐藏大臣及達賴喇嘛轄唐古特正副二使均歸達賴喇嘛四噶卜倫附以達勿私遣

允之

勅四噶卜倫曰西藏廣興黃敎爲清淨善地達賴喇嘛掌管西方釋敎廣演經法從前供養喇嘛一切事務原設噶卜倫四人至珠爾默特納木札勒諸事擅專不與

諸噶卜倫商議負恩任性潛懷異圖因此駐藏大臣將伊正法噶卜倫事務不可一人專辦特令策楞等簡選賢能仍照舊例分設噶卜倫四員公同辦事爾等當感恩戴朕恩尊敬達賴喇嘛和衷協力勉供職勿存私意致生猜疑勿分彼此互相瞻顧遇有重務稟知達賴喇嘛與駐藏大臣等遵奉指示而行爾等其感恩宣力副朕典黃教安羣生至意準噶爾台吉喇嘛達爾札尋請赴藏煎茶延唐古特喇嘛

上不允喇嘛達爾札復因拉達克汗致書唐古特達賴喇嘛責勿擅請

十七年珠爾默特納木札勒既誅

上念珠爾默特策布登功不忍絕其爵

詔珠爾默特旺札勒襲輔國公喇嘛達爾札遣申前請

上仍不允

詔議防藏地班第等奏準噶爾通藏隘有阿里那克桑  
騰格里諾爾阿塔雅克四路那克桑路稍近已設汛拉  
達克距阿里近雖與準噶爾互市必不令兵入境葉爾  
羌亦可通阿里中有大山隔之且阿里距藏兩月餘聞  
賊至易備惟騰格里諾爾阿哈雅克路較闊亦俱嚴設  
汛唐古特有馬兵萬餘步兵萬五千若準噶爾自騰格

里諾爾阿哈雅克至則令車稜旺札勒以蒙古唐古特兵禦之。徵袞布達克布等番兵援由阿里那克桑至則令色玉特色布騰以近牧兵禦之。檄阿里兵援班第達及尼瑪嘉穆錯留藏護送達賴喇嘛至班禪喇嘛駐札什倫布。距前藏七百餘里。值用兵令移居前藏。若準噶爾領眾至則移達賴喇嘛班禪喇嘛至泰甯以駐藏官軍及唐古特兵屯要汎待大兵援。

允之。準噶爾使久不至。

諭達賴喇嘛嚴備復定議西自阿里東至喀拉烏蘇增雜拉沙木等十三汎。

二十年大軍討準噶爾擒台吉達瓦齊。

諭唐古特部知之達賴喇嘛獻銅佛三慶捷。

詔納會阿睦爾撒納叛擾伊犁。

詔唐古特復設汎。

二十二年第七世達賴喇嘛示寂。

二十三年阿睦爾撒納走死逆回布拉呢敦霍集占等復叛據葉爾羌喀什噶爾。

詔勿撤唐古特汎。

二十四年拉達克汗謀定邊將軍兆惠取烏什阿克蘇等城將抵葉爾羌奏請助剿回逆。

諭曰爾遠處邊地感戴恩澤朕鑒爾忱深爲慰悅大軍進剿回逆凡所克城俱設兵駐防今布拉呢敦霍集占力窮勢蹙必將棄巢遠遁朕不以出兵擒剿事責爾倘逆回竄入爾境爾當擒獻藏所朕必優加恩賚若不遵奉諭旨異日朕必知之非爾益也是年大單定葉爾羌喀什噶爾霍集占等竄巴達克山

詔拉達汗勿復遣偵巴達克山尋函獻霍集占首  
詔撒唐古特汎西陲蓋自此永定

二十八年授輔國公恭格丹津爲噶卜倫札薩克一等  
台吉車稜旺札勒卒孫索諾木旺札勒襲

二十九年

欽定西域同文志

御製烏斯藏卽衛藏說曰藏地處蜀與滇之徼日藏云者非華言實番言也番又或謂之唐古特今班禪額爾德尼所居實稱藏達賴喇嘛所居實稱衛元明時有烏斯藏朵甘衛指揮諸司之名或以爲異於衛藏而不知實同也蓋嘗以唐古特文字詳覆互證乃知烏斯藏卽衛藏其音其義無不一以貫之也且以音言斯蓋薩之餘音滿字爲薩音半字爲斯音唐古特收音之斯字卽與國書之伊字收音通則烏斯之切爲衛如烏伊之初

爲衛也亦猶阿伊之爲愛噶伊之爲該喀伊之爲開也  
國書斯字伊字雖各爲收音然唐古特收音字無伊字  
而有斯字由烏斯推之而愛亦阿斯該亦噶斯開亦喀  
斯何不通之有若夫衛藏之爲義則衛蓋彼言中也非  
華言置衛之謂也以烏合斯爲衛音而中義藏則切匪  
阿爲藏音而其義則淨之謂也唐古特老若幼無不知  
之今以不識唐古特文字之人而與一二譯出華言中  
辨其是非豈非嚼蠟哉或又曰衛既以中爲義則今之  
所謂前藏之說何居曰此更非唐古特之本有而興於  
今之華言也然以今日疆域言之自打箭鑪取道由東

南迤及西南先經喀木次衛次藏是全藏形勢固宜前  
喀木而後藏而衛適其中處之地喀木之木爲半字音  
應從喀字而其義則邊界之謂也今稱前後藏者則因  
二地有達賴喇嘛班禪額爾德尼居之而達賴喇嘛位  
居長遂並以藏屬之更易中爲前而今自京都目之且  
統以爲西藏云耳然則烏斯藏之卽爲衛藏不愈信哉  
夫藏之內屬肇自元代音譯展轉沿薩爲斯原無歧舛  
惟文士墨守蠹簡旣不克兼諳西竺之書而彼中服習  
梵文者又豈能筆授心通取腹地史乘傳譌一一悉爲  
釐訂毋惑乎攷文之難也予因輯同文志類次西藏所

隸爲系三合切音者特揭是說以發其凡

三十六年

詔建布達拉於避暑山莊左。肖衛式。初厄魯特崇黃敎。  
噶爾丹策凌建都綱于伊犁河濱。北曰固爾札。南曰海  
弩克。設西勒圖四集喇嘛千餘。以塔本集賽輪值贍之。  
蒙古謂五爲塔本。謂輪值爲集賽。每歲首及盛夏。台吉  
宰桑等以瞻禮至。後固爾札爲阿睦爾撒納所燬。大軍  
定準噶爾亂。

詔如固爾札式。建安遠寺于避暑山莊北隅。以準噶爾  
台吉達什達瓦屬來歸者居其側。青海厄魯特及喀爾

喀杜爾伯特諸台吉值班秋觀輒

命瞻禮至是布達拉落成土爾扈特汗渥巴錫和碩特台吉恭格等挈數萬眾來歸

詔瞻禮之蓋以綏靖荒服非惟闡揚黃敎爲也

三十八年授札薩克一等台吉索諾木旺札勒爲噶卜倫噶木倫輔國公恭格丹津卒子札什納木札勒襲索諾木旺札勒由穆嚕烏蘇助金次所需物

賜幣獎

四十二年札薩克輔國公珠爾默特旺札勒卒子諾爾布朋素克襲

四十四年班禪喇嘛奏請入觀祝

釐

詔建札什倫布于布達拉左肖藏式。

四十五年五月

駕南巡旋班禪喇嘛使伊什巴爾珠布等迎

觀于趙北口。

命觀龍舟水嬉六月。

幸承德府。

駐蹕避暑山莊班禪喇嘛使穆占巴等齋輶重至。

詔居札什倫布旁舍時盛暑仍服氈毳。

詔賜紗葛并

給銀及藥物七月班禪喇嘛至舊例以達賴喇嘛班禪喇嘛有高行

諭旨至始下牀入

覲惟令跼不拜至是班禪喇嘛固請拜

上嘉其誠敬聽之

賜宴萬樹園

詔瞻禮布達拉八月行

萬壽慶典班禪喇嘛稽首頌無疆九月班禪喇嘛扈

蹕旋

賜宴南苑以香山昭廟歲工。

詔慶讚之班禪喇嘛自崇德時通貢至是凡三世初封曰羅卜藏吹吉嘉穆錯次曰羅卜藏伊什皆

勅賜班禪額爾德尼號次曰羅卜藏巴爾丹伊什如之是役也以不召至跋涉三萬餘里入覲蒙古內札薩克四十九旗及喀爾喀厄魯特諸部汗三公台吉聞之莫不歡忭舞蹈執役觀

慶典十一月班禪喇嘛示寂。

勅於所居建清淨化城。

四十六年送舍利歸藏復

遣官齎金冊印封羅卜藏丹巴旺舒克札木巴勒嘉穆錯爲達賴喇嘛時其父第巴阿木布木前卒

諭曰第六世喇嘛羅卜藏噶勒藏嘉穆錯之父索諾木達爾札曾封輔國公今新達賴喇嘛已賜冊命其父已故未及授封其兄索諾木達什爲哲卜尊丹巴呼圖克圖父著授輔國公爵如索諾木達爾札例索諾木達什尋卒

詔以哲卜尊丹巴呼圖克圖弟喇布丹納木札勒襲四十八年理藩院議奏索諾木達什以達賴喇嘛故封輔國公爵子喇布丹納木札勒繼襲嗣若仍予世襲則

與來歸有功之蒙古王公等無別請俟喇布丹納木札勒出缺後停襲嗣有似此者皆令承襲一次

詔如議

詔札薩克輔國公諾爾布朋素克札薩克一等台吉索諾木旺札勒札薩克一等台吉索諾木喇什咸世襲罔替理藩院議俟輔國公札什納木札勒出缺後停襲諭曰索諾木達賴爾札以生達賴喇嘛故封輔國公爵伊子孫承襲二次今達賴喇嘛示寂若其父所遺世爵竟爾裁汰朕心實爲不忍如仍世襲公爵于例又屬難行朕念達賴喇嘛俟札什納木札勒出缺後著加恩賞

給一等台吉世襲罔替并著爲例永遠遵行  
四十九年

遣官齎玉冊印

賜達賴喇嘛復

敕封班禪喇嘛之瑚畢勒罕爲班禪額爾德尼以幼未  
賜名

五十三年巴勒布賊侵西藏界侍郎巴忠奉  
命赴藏查辦奏索諾木旺札勒素向巴勒布商賈勒索  
狀

諭曰索諾木旺札勒平素既向巴勒布商賈勒索巴勒

布賊人侵藏之事卽係伊激成伊身若在必當從重治罪今伊業已病故雖不加深究但不當仍令其子承襲札薩克台吉索諾木旺札勒之札薩克一等台吉著停其承襲以示懲儆

謹案 先大夫自訂年譜云乾隆四十七年充

國史館纂修官先是奉

旨創立蒙古王公表傳武進管先生幹貞纂傳數篇奉  
差離館時無錫相國嵇文恭公爲總裁知余諳習清文  
派令接纂是書余旣任事通核立傳體例計內札薩克  
凡四十九旗外札薩克若喀爾喀土謝圖汗車臣汗札  
薩克圖汗賽因諾顏若青海若阿拉善若土爾扈特多  
至二百餘旗以至西藏及回部均應立總傳分傳羌無  
故實文獻奚徵雖有鈔送旗冊雜亂糾紛卽人名亦難  
卒讀無可作據乃悉發大庫所貯清字紅本督閱搜查

凡有關於外藩事蹟者概爲檢出以次覆閱詳校擇其緊要節目隨閱隨譯薈萃存作底冊以備取材每於灰塵坌積中忽有所得如獲異聞積累既久端緒可尋於是各按部落條分縷析人立一傳必以見諸

實錄紅本者爲準又以西北一帶山川疆域必先明其地界方向恭閱

皇輿全圖譯出山水地名以爲提綱其王公等源流支派則核以理藩院所存世譜訂正勿訛如是者八年而書始成時與余同修此書者惟檢討郭可之在達一人耳云云先大夫旣成表傳一百十二卷進呈

御覽爲今著錄四庫之

欽定外藩蒙古回部王公表傳底冊數十秩未經更事  
釐訂藏之家篋五十餘年幸無失墜逮寫藻奉

命視學江蘇駐節江陰武進李申耆前輩見而好之因  
屬寶山毛生甫先生爲參攷編輯江陰宋勉之補表成  
書二十二卷題曰藩部要略從西陲要略例也又越七  
年平定張石州復爲校補譌脫乃墨諸版石州又以先  
大夫之剏爲各傳也先辨其地界方向譯出山水地名  
以爲提綱而是編疆域未具讀者眩之爰以會典一統  
志爲本旁采各書別纂爲蒙古游牧記若干卷它日卒

業將附梓以行道光二十五年歲次乙巳五月男寓藻謹記